CBETA電子佛典集成

CBETA Chinese Electronic Tripitaka Collection ebook

T14n0480

佛說月上女經

隋 闍那崛多譯

目次

- 編輯說明
- 章節目次
- 差目次 6 001 002 替助資訊

編輯說明

- 本電子書以「CBETA 電子佛典集成 Version 2022.Q1」為資料來源。
- 漢字呈現以 Uni code 3.0 為基礎,不在此範圍的字則採用組 字式表達。
- 梵文悉曇字及蘭札字均採用羅馬轉寫字,如無轉寫字則提供字型圖檔。
- CBETA 對底本所做的修訂用字以紅色字元表示。
- 若有發現任何問題,歡迎來函 service@cbeta..org 回報。
- <u>版權所有</u>,歡迎自由流通,但禁止營利使用。

No. 480

佛說月上女經卷上

隋天竺三藏法師闍那崛多譯

如是我聞:

一時,佛在毘耶離國大樹林中草茅精舍,與大比丘五百人俱,皆阿 羅漢。復有菩薩八千人俱,皆是大德,有大威力、有大神通,悉皆 受持諸陀羅尼,得無礙辯、得諸禪定、得無生忍,具足五通,所言 真實無有虛妄,離諸譽毀。於己眷屬及以利養悉不染著,不求報故 為人說法,得深法忍能度彼岸,具足無畏已過魔事無有業結。於諸 法性無有疑滯,無量百千那由他劫修行成就,恒以悅色慰喻行者終 無嚬蹙,善巧辭句心不變改辯說無窮,亦皆成就平等忍法。能於大 眾說法無畏,說一法句過百千億那由他劫,得巧方便無盡智慧,知 諸三世猶如幻化,亦如陽焰、如水中月、如夢如星、如空谷響。知 諸法性空無相願心常寂滅,住真如法離諸取捨;既得無量智巧方 便,亦知眾心所行智巧方便之事,隨所化處悉皆能為演說諸法。於 眾生心無有損害離諸愛染,無復煩惱具足忍行。於諸法性皆悉了 知,已得成於諸佛剎土莊嚴之事,恒常成就念佛三昧;亦能成就勸 請佛智,能斷種種煩惱諸使。於諸三昧三摩鉢帝遊戲其中;亦悉能 得智巧方便。其名曰:文殊師利童子菩薩摩訶薩、觀世音菩薩、大 勢至菩薩、難有菩薩、香象菩薩、不捨擔菩薩、日藏菩薩、陀羅尼 菩薩、放香光菩薩、雷音菩薩、分別金光明決定王菩薩、那羅延菩 薩、寶才菩薩、寶印手菩薩、虛空藏菩薩、熹王菩薩、熹見菩薩、 度眾生菩薩、常精進菩薩、常喜根菩薩、破惡道菩薩、金剛遊步菩 薩、三界遊步菩薩、行不動菩薩、不空見菩薩、功德藏菩薩、蓮華 德菩薩、如香象菩薩、得深智辯菩薩、大辯菩薩、法上生菩薩、諸 法無疑德菩薩、師子遊步菩薩、散諸恐怖菩薩、蔽塞諸障菩薩、師

子吼音菩薩、非不言菩薩、辯聚菩薩、彌勒菩薩摩訶薩等而為上 首;復有如是百千菩薩摩訶薩俱。

爾時世尊在毘耶離大樹林中草茅精舍。時,諸國王大臣百官、大富長者婆羅門等,居士人民遠來商客,皆悉尊重恭敬奉侍。

爾時,彼城有離車,名毘摩羅詰,其家巨富資財無量,倉庫豐盈不可稱數,四足二足諸畜生等悉皆充溢。其人有妻名曰無垢,可憙端正形貌姝美女相具足。然彼婦人於時懷妊滿足九月,便生一女姿容端正,身體圓足觀者無厭。其女生時有大光明,照其家內處處充滿。如是生時大地震動,其家門外所有樹木,竝出酥油自然流溢。毘耶離城一切大鼓及諸小鼓,種種音樂不作自鳴,上徹虛空天雨眾華,於其宅內四角各有伏藏自開,微密雜寶皆悉出現。其女當生不曾啼哭,即便舉手合十指掌,而說偈言:

「由昔不造諸惡業, 今得如是清淨身; 若當浩作惡業者, 不生在此大豪貴。 故由昔斷諸惡行, 好施調順不放逸; 恭敬嚴重所尊故, 方得生此賢善家。 我念往昔迦葉佛, 乞食來入毘耶離; 我在樓上見彼尊, 如是見己心清淨。 我心既得清淨已, 供養尊重彼如來; 爾時現在無香華, 塗香末香飲食等。 佛於世間不求報; 遂即聞於空中聲, 慈愍一切諸眾生, 是故遊行來乞食。 汝欲供養彼尊者, 當發無上菩提心; 比於三界設供養, 不如信發道心者。 我聞如是空聲已, 復見諸佛微妙相; 遂發不動菩提心, 從於樓上墜身下。 住空高一多羅樹, 復見十方一切佛; 猶如雜寶須彌山, **泇葉佛身亦復爾**。 是時諸佛神力故, 曼陀羅花滿我手; 即成清淨妙花蓋。 我時散於迦葉上, 所見十方諸佛者, 微妙相好莊嚴身; 我見曼陀羅華蓋, 亦復同如迦葉上。

我時空中說是語, 願作兩足最勝尊; 不獲菩提誓不退。 修行乃至塵數劫, 天龍乃至非人等, 八部其數有二千; 閏我如是師子吼, 亦發無上菩提意。 我捨三十三天已, 環來生於閻浮提; 恒常不失賢善行, 故勸汝等修福業。 我在三十三天時, 供養釋迦牟尼佛; 今生不為五欲故, 唯環供養此如來。 我念宿世諸業報, 凡經八十九處生; 所受福德皆如今, 智者官應供養佛。 1

爾時彼女說此偈已默然而住。其女往昔造諸善根業因緣故,其身自然著諸天服妙寶衣裳,於其身上出妙光明勝於月照,猶如金色耀其家內。然其父母見彼光故,即為立名稱為月上。

爾時月上生未幾時,其身忽然如八歲大,彼女行住坐立之所,其地皆悉光明晃耀,身諸毛孔出栴檀香,口氣香如優鉢羅花。毘耶離城所有剎利王公子弟,及諸大臣居士長者婆羅門等,及餘大家豪姓種族所有童子,遙聞彼女月上名聲端正可憙世無雙比,聞是事已,彼等悉皆欲火熾然,心懷熱惱遍滿身體,一一皆作如是思惟:「願得彼女月上為婦。」爾時,一切諸童子等作是念已,皆悉往至毘摩羅詩離車之家,通傳意趣進止參承,各各皆許無量珍寶,駝驢象馬諸財物等;或有共彼離車相見,口憭嚇云:「我當抑奪。」或有呵喝作如是言:「汝今若不與我女者,我必劫汝床褥臥具、財物衣裳身諸瓔珞,一切服飾悉皆將去。」或言打者或言縛者,將如是等恐怖之事而以告之。

爾時,離車毘摩羅詰心生恐怖,舉身毛竪憂愁不樂,作如是念:「彼等或有以其勢力將欲抑奪我女月上而將去者;或有欲來奪我命者。」然彼離車失其本念,煩冤懊惱嚬眉皺頰,眼目不瞬而向其女,遂即舉聲啼呼涕泣淚下如雨。

爾時月上,見父如是憂愁啼哭而問之言:「父於今者何故懊惱啼哭如此?」

爾時,離車毘摩羅詰告其女言:「汝於今日可不知乎?為汝身故,城內一切所有人民,悉皆共我身為惡結,是故各各欲來爭汝。我今 將恐被其勢力劫汝將去,損我身命及諸財寶竝皆喪失。」

爾時月上,即以偈頌報其父言:

「假使閻浮大地内, 所有一切諸眾生, 悉各力如那羅延, 人人手執利刀仗, 盡其身力診逐我, 彼終不能害得我; 慈心毒仗所不害, 水火亦復不漂然, 不畏死屍諸鬼便, 及以呪咡言說者; 慈心決定無瞋恨, 慈心畢竟不畏他。 我今起此慈心念, 護世猶如護身已; 現亦不與他人苦, 是故誰當能害我? 厭欲自無有欲想, 成慈亦無恚怒癡; 是故無能害我者。 我無欲瞋及癡患, 我觀一切諸眾生, 皆悉猶如父母想; 世間但有此慈者, 他人決定不能欺。 假使虚空沒於地, 及以須彌入芥子; 亦復無能降我身。」 四大海水 處牛跡,

爾時月上說此偈已,白父母言:「尊者父母!若必定有如此事者,願於此處毘耶離城四衢道頭振其鈴鐸,號令城內一切人民作如是言:『從今七日我女月上定當出外,自求婚嫁選擇夫主。汝等一切諸男子等未婚娶者,應當各各好自嚴飾衣服瓔珞;亦須掃除城內街巷布散香華,燒香末香及華鬘等悉各備辦,竪立寶幢張懸幡蓋。如是種種好自莊嚴,以如是等諸種法用,諮請父母令作是事。』」

爾時父母聞女語已,即取其言,從家而出,依女所說,即便振鈴遍告城內一切人民,作如是言:「我女月上!從今日後至於七日,當從家出自求婚嫁選擇夫主。汝等應當各自怒力莊嚴衣服掃治街巷,

布散香華燒香末香悉各備辦,竪立寶幢及諸幡蓋,如是種種好自嚴 飾。」

爾時城內一切人民,聞此語已心生踊躍,各各自於當家門庭及以街巷,嚴飾壯麗過上所陳。

爾時城內剎利大臣,及婆羅門居士長者,乃至工巧,所有童男皆悉 沐髮澡浴身體塗治妙香,各各爭競嚴飾衣服及諸瓔珞,作如是已,方始復告左右眷屬,作如是言:「汝等心意不得傾動莫生餘念。其 女月上若不來向於我邊者,汝等必須強力助我而奪取之。」

爾時,月上至後六日,是月十五圓滿之時,受八關齋,其夜明靜在於樓上往來經行。佛神力故於其右手忽然有一蓮華自出,黃金為莖、白銀為葉、琉璃為蘂、馬瑙為臺。其花合有一百千葉,光明曄曄妙麗精華,華內有一如來形像結加趺坐,身如金色自然顯現,威光赫奕明照彼樓,具三十二丈夫之相、八十種好莊嚴其身。彼如來像所出光明,亦復遍照月上家內。

爾時月上於自右手忽見華已,<mark>瞻</mark>仰覩彼如來形像,歡喜踊躍遍滿其體不能自勝,即便以偈問彼所化如來形像,作如是言:

「不審仁者為天龍, 為緊那羅夜叉等, 唯願德聚為我說。 為是鬼神阿修羅? 猶如金色日天等; 尊者此身不思議, 或復變化黃色身, 忽似頗黎紅縹色。 我於身心無有想, 見尊功德大歡喜; 仁者今為誰所使? 未審又從何方來? 不知來意為何緣? 來已還欲至何所? 尊嚴顯赫如火聚, 功德巍巍似須彌。」

爾時彼化如來形像,復以偈報月上女言:

「我今非天亦非龍, 又非夜叉乾闥婆;

師子釋種佛世尊, 今遣我來至儞所。 故非天龍及夜叉, 非人亦非緊那羅, 非須輪等八部眾, 我直釋種佛使者。」

爾時月上復以偈頌,白彼所化如來形像,作如是言:

「仁今所言佛世尊, 彼形色體何所似? 願為我說彼形相, 我得聞已如是思。 又自言我佛法使, 而不為我說佛相; 我觀仁威及神力, 世間無比即如佛。」

爾時彼化如來形像,復以偈答月上女言:

「彼尊形體真金色, 具三十二大人相, 能為眾生作福田, 是故其名號為佛。 又復了別眾生心, 自能覺知一切法, 若上若中若下者, 是故其名號為佛。 於世間事悉知解, 及以了知一切法; 知諸法已達彼岸, 是故其名號為佛。 於諸一切眾生心, 自心一一能知見; 而於眾生及與心, 二處俱亦不染著。 彼因行施得作佛, 及能常持清淨戒, 又復忍辱及精進, 禪定智慧等成佛。 於世事無不知者, 所謂一切諸技藝; 常懷慈悲喜捨心, 是故其名號為佛。 降伏一切諸魔等, 名聞震動千萬界; 自能覺悟無上道, 是故其名號為佛。 彼昔恒常能輪轉, 一切諸法無上輪; 光明普照千萬剎, 常說苦空及無我。 諸佛剎十有千數, 百數億數那由他; 廣大舌根能 遍覆, 是故其名號為佛。 諸佛剎十有千數, 其數又如恒河沙; 彼出大聲悉編滿, 是故其名號為佛。 諸佛剎十千億數, 彼尊以手能執持; 一住不動千萬劫, 是故其名號為佛。 諸佛剎十千億數, 其剎所有諸須彌; 彼尊一毛繫縛已, 能持行至數億剎。

聞往諸佛上妙句, 於法自在度彼岸; 自覺證已能度眾, 是故其名號為佛。 自在十力皆具足, 又能成就四無畏; 於諸佛法無有疑, 是故其名號為佛。 佛無能作灌頂者, 五眼成就悉具足; 五根五力等圓備, 七覺分道無染著。 寂定調伏最無比; 善持禁戒善共住, 無諂無曲心調順, 是故其名號為佛。 佛者恒入諸禪定, 心無暫亂亦無畏; 是故其名號為佛。 利益眾生說知時, 一切功德悉具足, 為諸眾生等供養; 具一切智見諸法, 是故其名號為佛。 我若經由一劫說, 或經百數千萬劫; 何故其名號佛者? 說不可盡故名佛。」

爾時月上聞此偈已,歡喜踊躍遍滿其體不能自勝,心生渴仰欲見如來。復以偈頌白彼化像,作如是言:

「尊者如是說功德, 我今欲見可得不? 智者若聞如此法, 决應不樂在家住。 我今若不見佛者, 必定不飲不食噉; 亦復不樂著睡眠, 及以不坐本床鋪。 我見尊者已歡喜, 復聞彼德獲淨意; 若對見彼佛體相, 當更發大歡喜心。 佛大丈夫世難聞, 經由劫數百千億; 彼尊今在何方所?」 我已聞斯漏盡名, 「法王今在大林内; 所化如來即報言: 其有徒眾數百千, 清淨離垢悉勇猛。 一一能負三千界, 手擎經劫不疲勞; 得定智慧辭無礙, 具獲多聞如大海。 一頃遍禮彼諸佛; 神涌能至數億剎, 供養千萬諸佛已, 於一時頃還復來。 無有我想及佛想, 無有剎想及法想; 一切諸想悉無染, 於諸眾生作利益。 汝若欲見彼世尊, 及大菩薩聲聞眾; 聽於微妙諸佛法, 速往彼大導師邊。」

爾時月上執彼蓮華及以化佛,從樓閣上下來,往至父母之邊。到已 說偈白其父母,作如是言:

「父母觀我所執華, 微妙萃稈金剛色; 又觀無上華中者, 諸相莊嚴如山王。 如是微妙最勝尊, 何人當可不供養? 我今見於遍家內, 金色光曜母應知。 其身不可遍度量, 須臾變成種種色; 我等今須設供養。 赤白黃紫及頗黎, 大聖瞿墨在大林, 谏執華香及末香; 父母同往設供養, 應獲無量諸功德。」 父母聞已唱善哉! 月上此言大利益。 遂辦種種諸香等, 寶幢幡蓋及花鬘。 月上父母及親眷, 悉著微妙上衣服, 無價珍寶及音聲, 種種莊嚴悉充備。 既嚴備已從家出, 欲往大林世尊邊。

爾時月上所期之日,六日已過至第七日。時有無量千數大眾,集會俱來看彼月上。於時眾內或有諸人以欲惱心而來會者;或有因看毘耶離城,觀其城上所有莊嚴,却敵樓櫓、雀墮寮窓、勾欄藻稅諸雕飾事,而來會者。時有無量男夫婦女,因涉彼城而看月上。爾時月上仍執彼華,其女父母及其眷屬,齎諸花鬘塗香末香種種燒香上妙衣服,寶幢幡蓋種種音聲,左右侍從周匝圍遶,從家而出在於街巷。

爾時月上諸眷屬等,出至街巷如是行時,無量無邊千數人眾,見彼月上在於街巷進止行時,即詣其所而口悉各唱如是言:「此是我妻此是我妻。」

爾時毘耶離大城之內,或有諸人一時走來,出聲大叫向月上女。是時彼女見其大眾速疾來故,遂即飛騰在於虛空高一多羅,仍執彼華在空而住,以偈白彼諸大眾言:

「汝等觀我此妙身, 猶如真金帶火色;

非因昔發欲心故, 能得如是微妙身。 棄捨婬欲如火坑, 及諸世事不染著; 能行苦行調六根, 及行清淨諸梵行。 見他妻妾不貪欲, 皆生姊妹及母想; 如是當牛可烹身, 眾人樂見無厭足。 我身毛孔出妙香, 汝豈不聞滿此城? 此非欲心所熏得, 皆由布施調伏果。 我今本無婬欲心, 汝於無欲莫生欲; 今此尊像證明我, 如我實語無有虛。 汝等昔或作我父, 我或於汝昔為母; 互作父母及兄弟, 云何於此生欲心? 我或往昔 殺汝等, 汝等或復殺我來; 云何於此生欲想? 各作怨讎互相殺, 非因有欲得端正, 有欲定當生不善; 有欲心者無解脫, 是故今須捨欲心。 及以畜生種類中, 若墮地獄及餓鬼, 鳩槃夜叉阿修羅, 卑舍遮等皆因欲。 眼瞎無舌跛與聾, 身體形容悉醜陋; 一切種種諸過惡, 皆由往業多欲心。 若於來世作輪王, 帝釋三十三天主, 大梵自在諸天等, 皆由廣行淨梵行。 猪狗馬驢及駱駝, 生盲喑啞失本性, 象牛虎蠅蚊虻等, 皆由多欲獲此報。 豪富長者及居士; 生大地主喜樂家, 如此皆因行梵行, 現得歡喜常受樂。 負重者炙煙重鼻, 枷鏁杻械猧辱身, 斬截則劓及挑眼, 為人僕使皆因欲。 欲作緣覺及羅漢, 眾相莊嚴諸佛身; 自覺覺他廣利益, 皆由捨離有欲想。 行欲非唯一種患, 多諸過惡無利益; 速望解脫諸欲者, 共我往詣如來邊。 更無歸依能拔罪, 唯有諸佛天人尊; 汝等速往彼尊邊, 無量劫數佛難親。」

爾時月上說此偈句語諸人已,是時大地皆悉震動,於虛空內而有無 量諸天子等,揚聲大叫舞弄身衣,詠歌嘯調無量無數,雨諸天華百 數千數,作諸音樂不可具官。 爾時大眾見聞是已,遂生厭離諸欲等想,生希有想未曾有想。當於爾時,舉身毛竪更無欲惱,無瞋無恚無貪無癡、無怒無妬無嫉無諍、無復煩惱無有諸使,皆以歡悅潤澤其身,各各互生父母兄弟姊妹諸親尊長等想;既捨一切諸煩惱訖,各各頭面禮月上女。

爾時大眾所執香華末香塗香,華鬘衣服諸瓔珞等,悉將散擲向於月 上。既散擲已,佛神力故,其物在彼化如來上成一繖蓋,廣半由 旬。

爾時月上還從空下去地四指,足步虛空經行來往,須臾即出毘耶離城,欲向釋迦如來之所。爾時月上安足之處地皆震動,而彼大眾其數八萬四千人俱,隨從月上次第而去。

爾時長老舍利弗共五百比丘,於晨朝時整衣持鉢,為乞食故便來向於毘耶離城。時彼聲聞諸徒眾等,遙見月上與其大眾前後圍遶相向而來。時舍利弗遂白長老摩訶迦葉,作如是言:「長老迦葉!彼所來者是月上女,欲向佛邊,我等且可逆問彼女,隨意義趣驗試其女得忍已不?」

爾時長老舍利弗等五百比丘,前行既至月上女邊,到已告言:「汝於今者欲何所去?」其月上女即報長老舍利弗言:「尊舍利弗!今既問我作如是言,汝今欲向何所去者?我今亦如舍利弗去如是去耳!」

爾時舍利弗復報月上作如是言:「我今欲入毘耶離城,汝於今者乃從彼出,云何報言:『我今亦如舍利弗去作如是去?』」

爾時月上復報長老舍利弗言:「然舍利弗!舉足下足凡依何處?」舍利弗言:「我今舉足及以下足竝依虛空。」其女復報舍利弗言:「我亦如是,舉足安足悉依虛空,而虛空界不作分別,是故我言:

『亦如尊者舍利弗去如是去耳!』尊舍利弗!此事且然,今舍利弗 行何行也?」

舍利弗言:「我向涅槃如是行也。」其女復白舍利弗言:「尊舍利弗!一切諸法豈不向於涅槃行也,我於今者亦向彼行。」

爾時長老舍利弗復問月上作如是言:「若一切法向涅槃者,汝今云何而不滅度?」其女報言:「尊舍利弗!若向涅槃即不滅度。何以故?其涅槃行不生滅故,涅槃行者不可得見,體無分別無可滅者,以是義故,行涅槃者即是涅槃。」

爾時舍利弗復問月上作如是言:「汝於今者行何乘也?為行聲聞乘?為行辟支佛乘?為行大乘?」爾時月上報舍利弗作如是言:「尊舍利弗!今既問我行何乘者,我今還問尊舍利弗,唯願如是隨意答我。如舍利弗所證法者,為行聲聞乘?為行辟支佛乘?為行大乘?」

爾時舍利弗復報彼女作如是言:「非也月上!所以者何?然彼法者,無可分別亦無言說,非別非一亦非眾多。」

爾時月上報彼尊者舍利弗言:「是故不應分別諸法,一相異相無別異相,於諸相中無有可住,故涅槃者實無可滅。」

爾時長老舍利弗復告月上作如是言:「希有希有!汝今乃能如此辯才無有滯礙,是故汝昔曾更奉侍幾許佛來?」

爾時月上報舍利弗作如是言:「尊舍利弗!今問於我,汝昔曾更奉 侍幾許諸佛來者,猶如實際與法界也。」

時舍利弗復問女言:「所言實際及與法界,有幾許也?」女復答言:「如無明有及以愛等無有異也。」

時舍利弗復問女言:「無明有愛復有幾許?」其女報言:「如眾生界無有異也。」時舍利弗復問女言:「眾生界者復有幾許?」其女報言:「如彼過去未來現在諸佛境界。」舍利弗言:「若如此者, 汝說何事是何解釋?」其女報言:「依尊者問,我還依答。」

時舍利弗復問女言:「我問何義?」其女答言:「問文字也。」舍 利弗言:「彼文字滅,無有足跡。」其女答言:「尊舍利弗!如是 滅相一切法中,如有問者、如有答者,二俱滅相不可得也。」

佛說月上女經卷上

隋天竺三藏法師闍那崛多譯

爾時長老舍利弗復問月上作如是言:「汝於今者在菩薩地有是忍相,汝當不久得成阿耨多羅三藐三菩提。」

爾時月上作如是言:「尊舍利弗!夫菩提者無有言說,但以假名文字說耳!所言成者亦假名說,若久若近俱是名字。尊者!云何作如是言:『汝當不久得成阿耨多羅三藐三菩提也。』尊舍利弗!夫阿耨多羅三藐三菩提者,彼無生處亦不可說,無有體性,其間亦復無可成者。何以故?菩提之體無有二相,是故菩提無二離一。」

爾時舍利弗告月上女作如是言:「汝今但當先向佛所,我等須臾為聽法故,不久當還向於彼處而來聽法。」

爾時月上復白長老舍利弗言:「尊舍利弗!如來不為聽法者說,亦復不為樂法者說。」舍利弗言:「如來若爾,為誰說法?」彼女答言:「尊舍利弗!若有所聞,不生著想無欣樂想,如來乃為如是說法。」

爾時舍利弗復語月上作如是言:「若有眾生詣佛聽法,為聞法故,如來爾時豈不為彼而說法也?」

爾時月上復答彼言:「若有眾生作如是想,此是如來為我說法,如是眾生住於我想;若有真洞入法性者則無是念,終不云佛為我等故說如是法。」

爾時尊者摩訶迦葉告於長老舍利弗言:「尊舍利弗!此女今既詣向佛邊,今日必當有大法義,我等亦可迴還而去,今日寧可不食為

善,莫使我等身在於外而不得聞如是法義。」是故彼等諸聲聞眾遂 即迴還,隨逐月上向於佛所。

爾時月上,漸行至彼大林之內草茅精舍,詣於佛所,頂禮佛足右遶 三匝,所持香華末香塗香,衣服資財寶幢幡蓋,所奉佛者以散佛 上,散已復散。彼時大眾,所持香華華鬘塗香及以末香,亦散佛 上,散已復散。所散諸華於佛頂上成一華蓋,縱廣遍覆滿十由旬。

爾時童子文殊師利告月上女作如是言:「汝於往昔從何捨身而來生此?當捨此身復生何處?」其女答言:「文殊師利!於意云何?我今所執如來形像坐蓮華者,從何捨身而來生此,今捨此身當生何處?」文殊師利復言月上:「此是化耳!夫言化者無處捨身後亦無生。」其女報言:「如是如是。文殊師利!一切諸法本體是化,我於彼法不見捨時、不見生時。」

爾時不空見菩薩告月上女作如是言:「如是月上!既不可以女身成佛,汝今何故不轉女身?」其女答言:「善男子!夫空體者無迴無轉,一切諸法亦復如是。云何令我而轉女身?」

爾時持地菩薩復告月上作如是言:「汝頗曾見如來已不?」其女答言:「善男子!我見如來如我手中所執化佛,如是如來等無有異。」

爾時辯聚菩薩復告月上作如是言:「汝今能辯法義已不?」時女答言:「善男子!法界之體不可言說,亦不可以文字算數之所攝受。」

爾時無礙辯菩薩復告月上作如是言:「汝於過去諸如來所,聞何等法?」其女答言:「善男子!今可仰觀如上虛空,如來說法與此虛空等無有異,其所聽者亦復如是。善男子!而彼法相等如虛空無異無別。」

爾時虛空藏菩薩告彼女言:「汝於往昔所施諸佛,云何奉施?云何迴向?」其女報言:「善男子!如我於此所化佛像施彼佛僧,所獲功德其事云何?」時虛空藏菩薩報月上言:「此佛是化,若於彼施無功德相。」其女答言:「善男子!我亦如是,往於昔日諸如來前,所行布施及以迴向,亦作是相亦作如是迴向。」

爾時不損他心菩薩復作是言:「汝今云何能於一切諸眾生等,得以慈心而普遍也?」其女答言:「善男子!如彼眾生等無有異。」菩薩復言:「彼諸眾生其事云何?」女復答言:「眾生之事,非是過去亦非未來亦非現在;而彼慈心亦復如是,非是過去非是未來非是現在之所攝也;亦復不可以言說也。善男子!而彼慈心其事如是。」

爾時喜王菩薩復問彼女作如是言:「汝於今者得法眼不?」其女答言:「善男子!我今肉眼猶尚不得,況得法眼。」

爾時堅意菩薩復告彼女作如是言:「汝行菩提經今幾時?」其女答言:「善男子!如彼陽焰經今幾時,我發菩提亦復如是。」

爾時彌勒菩薩告彼女言:「汝於何時當得成就阿耨多羅三藐三菩提?」其女答言:「亦如彌勒菩薩,何時得超凡夫行地。」

爾時長老舍利弗復白佛言:「世尊!希有此女如是辯才。云何乃能 與如是等鎧甲大龍共相問答,卓立不坐復不屈身禮諸菩薩?」

爾時月上白舍利弗作如是言:「尊舍利弗!譬如小火體能燒故,所有諸物悉皆能燒。如是如是!尊舍利弗!諸菩薩等與於諸佛亦無有異,於諸行中欲燒一切諸煩惱時,所有煩惱或自或他莫不能燒。」

爾時舍利弗復問女言:「汝當成就阿耨多羅三藐三菩提時,而彼佛 剎當如之何?」其女答言:「尊舍利弗!我於當來佛剎之中,無有 如是小行小智名字狹劣,猶如今日舍利弗者,我必當取如是佛剎。」

爾時舍利弗復言月上:「汝既說言一切法界與如來體等無有異。今者所見云何勝負?」月上女言:「尊舍利弗!譬如大海與於牛跡,然彼二水等無有異,而彼牛跡不受無量無邊眾生如大海者。如是如是!尊舍利弗!諸佛聲聞雖同法界,而諸聲聞不能為於無量無邊諸眾生輩,作大利益如諸佛者。又舍利弗!譬如芥子內有虛空,十方世界亦有虛空,彼二虛空雖無有異。然芥子空不能容受聚落城邑,不能建立須彌巨海,似如十方世界空者。如是如是!尊舍利弗!雖於一空無想無願,而有諸佛與聲聞同;然彼聲聞不能與彼無量無邊諸眾生輩作大利益,如似諸佛、多陀阿伽度、阿羅訶、三藐三佛陀者。」

爾時長老舍利弗言:「如是月上!佛與聲聞所得解脫豈不等也?」 月上答言:「尊舍利弗!勿作是說,乃言諸佛與彼聲聞解脫同 等。」

時舍利弗復問女言:「如是之事其相云何?」女復答言:「尊舍利弗!我於今者欲有所問,如尊者意為我說之。尊者證得心解脫時,頗能令此三千大千如是世界平如掌不?頗有樹木及以諸山悉各傾低向汝已不?頗或能有除滅一切諸惡已不?頗有悉除一切眾生煩惱已不?頗有能得一切諸天頂禮已不?頗有魔眾聚集遍滿三十由旬而來已不?頗有一念起智慧心得解脫已不?頗復能降一切諸魔眷屬已不?」

時舍利弗答月上女作如是言:「我於如是一切諸事悉無有一。」

其女復言:「尊舍利弗!菩薩在於菩提道場,能有如是勝妙諸事, 復有無量無邊勝事。尊舍利弗!聲聞解脫、諸佛解脫,乃有如是勝 負優劣差別之事,尊者云何作如是念,謂佛如來與於聲聞解脫等 也?」

爾時世尊讚月上女作如是言:「善哉善哉!月上!汝今乃能如是無礙辯說。」

爾時所化如來形像在月上女右手之中,即從華起,至世尊所,圍遶世尊滿三匝已,從臍而入,佛神力故大地震動。

爾時世尊一一毛孔出一蓮華,色如真金,白銀為葉,功德藏寶以為蓮臺。彼諸華內自然各各復出一佛結跏趺坐。彼諸如來所化形像眾相莊嚴,遍至十方諸佛剎土,自然顯現為彼說法。彼諸佛剎所說法句,以佛神力,聲還聞此如來剎土。

爾時月上見如是等妙勝神通,歡喜踊躍遍滿其體不能自勝。其女右手所執蓮華,遂捉投擲如來身上,其華到已在於佛頂成一花帳。其帳方整下有四柱,縱廣正等如依繩墨。帳中自然化出一座,眾寶莊嚴,無量天衣以覆座上。其座爾時忽復有一化佛形像如釋迦者,坐彼座上結加趺坐分明顯著。而月上女擲彼華時作是願言:「世尊!願我藉此善根因緣力故,於未來世,若諸眾生住我相者,為說其法令除我相。」

爾時彼女以佛神力,忽然復有第二蓮華現其右手,彼女於是復以其華擲向如來,其華至已在如來上為第二帳,眾寶莊嚴如上所說。於時彼女復言:「世尊!願我藉此善根因緣,於未來世,若有眾生住我見者,為說其法得除我見。」

爾時彼女以佛神力,忽然復有第三蓮華現其右手,其女爾時復以此華擲向如來,於即化成第三華帳,眾寶莊嚴如上所說。是時彼女復言:「世尊!願我藉此善根因緣,於未來世,若有眾生住於一切分別相者,我為說法除其分別,及除貪欲瞋恚癡等。」

爾時彼女忽然復有第四蓮華現其右手,其女亦復以彼蓮華投擲如來至於佛頂,尋復化成第四華帳,其所莊嚴如上所說。復言:「世尊!願我藉此善根因緣,於未來世,若有眾生住四顛倒,我為說法令除四倒。」

爾時彼女復以如來神通力故,忽然復有第五蓮華現其右手。其女爾時復以其華向如來擲,其華至已在於佛頂,亦即成其第五華帳,其帳莊嚴亦如上說。其女於時復言:「世尊!願我藉此善根因緣,於當來世,若有眾生五蓋覆者,為說其法令除五蓋。」

爾時彼女以佛神力,忽然復有第六蓮華現其右手,其女亦復持彼蓮華擲向如來,其華至已在於佛頂,亦復化成第六華帳,其所莊嚴如上所說。是時彼女復言:「世尊!願我藉此善根因緣,未來世中,若有眾生著六入者,我為說法令離彼著。」

爾時彼女以佛神力,於其右手忽然復有第七蓮華自然顯現,其女爾時復以彼華擲向如來,至佛頂已即復變成第七華帳,形狀大小如上所說。其女爾時復言:「世尊!願我藉此善根因緣,於當來世,若有眾生住著七識,我為說法令其除斷。」

爾時彼女以佛神力,忽然復有第八蓮華現其右手,其女復持向佛而 擲,其華至已次第成其第八華帳,形狀縱廣亦如上說。其女於是復言:「世尊!願我來世藉此善因,若有眾生著八顛倒,為說其法令悉除滅。」

爾時彼女以佛神力,忽然復有第九蓮華現其右手,其女復將遙擲佛頂,其華至已次第復成第九華帳,其帳縱廣如上所說。其女於是復言:「世尊!願我藉此善根因緣,於當來世,若有眾生住九使者,我為說法令除九使。」

爾時彼女以佛神力,忽然復有第十蓮華現其右手,其女於是復以彼華鄭如來頂,其華至已次第復成第十華帳,莊嚴縱廣如上所說。其女爾時復言:「世尊!願我藉此善根因緣,於當來世具足十力,如今世尊放大光明照十方剎等無有異。」

爾時彼等所化華帳高至梵宮,是以地居乃至大梵諸天子等,因彼華帳,復與無量千萬天眾同來集會。

爾時世尊便有微笑。然諸佛等有如是法,微笑之時從其口出種種色光,其光所謂青黃赤白頗梨等色,及以金銀如是等色。而彼光照至於無量無邊佛土,普至梵天覆翳日月,光明威力勝盛無比,晃耀顯赫還入佛頂。爾時眾中長老阿難從坐而起,整理衣服偏袒右臂,右膝著地合十指掌,以偈問佛微笑放光因緣之事:

「一切諸智非無眼, 於一切法無有疑; 普照世間光平等, 及以微笑有何緣? 往昔劫數尊行施, 清淨戒行如寶珠; 住忍不動如須彌, 尊今光笑有何緣? 常修精進及禪定, 得免諸有生死等; 意行深遠猶如海, 微笑放光有何緣? 常行慈悲無休息, 及以喜捨亦復爾; 尊笑放光有何緣? 迷失路者能濟拔, 遍至十方無量剎; 尊一毛孔出光明, 奪彼威力作他眼。 忽然覆蔽日月光, 所出音聲妙清淨, 具六十種世獨尊; 所有聞者無厭足, 復能除滅諸煩惱。 於十方剎無量眾, 一切心有所行者; 世尊知已決疑網, 尊笑放光有何緣? 誰今決定發道意? 誰今乘佛廣大乘? 世尊微笑而放光。 誰今如是滿心願? 誰今降伏四種魔, 謂煩惱魔及死魔, 陰魔及以天魔等, 微笑放光有何緣? 誰作法豐人師子? 世尊今誰證大利? 名聞誰至十方剎? 如是微笑及放光。 一切智者滅不善, 諸慈行中最勝慈;

於諸分別皆已斷, 微笑放光有何緣? 何誰今得廣大利? 誰復今得滿願心? 和合十力今是誰? 如是放光及微笑。 千萬諸天在虛空, 夜叉金翅摩呼羅, 及諸天女合掌禮, 瞻仰世尊歡喜心。 聚集無量諸菩薩, 十方剎土悉瞻仰; 深智如海欲聽法, 淨意光笑有何緣?」

爾時世尊即以偈句報阿難言:

「阿難汝觀此童女, 合十指堂在我前; 彼見諸佛妙神通, 即發無上菩提意。 過去曾見三百佛, 生生世世所見者; 恒牛恭敬而尊重, 常願云何證菩提。 願不生於惡道裏, 唯願生天及人中; 生處不忘菩提心, 命終已後知宿命。 昔見如來名迦葉, 在於樓上墜下身; 供養彼尊迦葉故, 現得無牛及順忍。 復有佛號鉤婁村, 奉施一具妙衣服; 是故現得金色體, 清淨顯赫如月天。 有佛迦尼迦牟尼, 香華塗末供養彼; 以是口出妙香氣, 插如栴檀優鉢羅。 佛名尸棄兩足尊, 瞻仰彼尊滿七日; 諸類看者不知厭。 是故兩目青蓮色, 厭離諸欲 万百世, 常行清淨諸梵行; 若人起欲來觀者, 乃得清淨無欲心。 是故三十三天生, 從彼來生離車種; 一切牛處知宿緣, 巧說諸偈微妙句。 教仆父母及諸親, 利益無量眾生等; 為欲教化發菩提, 故牛豪貴大離車。 童女男夫婦人等, 教化令入佛乘中; 二萬三千諸人類, 成熟無量菩提道。 其女轉此女人身, 不久出家在我法; 廣行清淨大梵行, 此處命終環生天。 從天命終復生此, 於後惡世護我法; 捨命還生兜率陀。 與此眾類作利益, 當來彌勒下生時, 儴佉輪王家作子; 其於彼眾多才藝, 可烹端正備諸德。

供養彼尊三月日, 及諸左右眾圍遶; 於彼佛邊得出家, 六千三百眾隨逐。 然後往牛安樂十; 受持彼佛正法已, 既得往見阿彌陀, 禮拜尊重而供養。 當於賢劫諸佛剎, 十方所有諸世界; 及以恒河沙如來, 悉為彼眾作利益。 供養如是諸世尊; 精進智慧禪定力, 劫數諸佛供養已, 教化無量千萬眾。 於後八萬俱致劫, 當得作佛名月上; 彼尊名號月上者, 眉間白毫出妙光。 其光金色甚耀麗, 顯赫遍照彼佛剎; 星宿諸光悉不現。 日月火光及摩尼, 書夜歲月及四時, 皆由彼光更無別; 彼剎當無辟支佛, 聲聞羅漢亦無名。 清淨勇猛菩薩眾, 彼尊唯當有如是; 百種諸相具莊嚴。 彼眾身並黃金色, 悉名為人妙可喜, 彼剎無欲胎牛者; 牛已即有大威德。 蓮華臺中自化生, 無量神通至諸剎; 於算數中不可量, 無牛忍法無障礙。 彼剎無魔及外道, 亦無破戒惡朋友, 受淨報如兜率陀; 諸受果報悉平等, 若有彼剎所生者, 金銀直珠微妙網, 廣大遍覆彼世間。 住世七十三千劫, 彼大世尊壽命長, 壽盡涅槃滅度後, 正法住世 滿一劫; 彼尊在世及滅度, 法教一住無有殊。 世尊剎土諸功德; 我若一劫讚歎彼, 如海取於一渧水。」 今日所說諸譬喻,

爾時月上從佛對聞與已授記,聞已歡喜踊躍無量,飛騰虛空,去地高至七多羅樹。既住於彼七多羅已,其女於即轉彼女身變為男子。即時大地皆悉震動,出大音聲、雨天華雨,出大光明遍照世界。爾時月上菩薩即住彼空,以偈嘆佛作如是言:

「假動須彌空倒地, 修羅住處皆悉滅, 大海枯涸月天墜, 如來終不出妄言。 假使十方眾同心, 或火成水水成火;

無量功德最大尊, 利益眾生無異說。 大地虚空成混沌, 百剎同入芥子中, 羅網可用縛猛風, 如來終不有妄語。 世尊如是直實言, 故我決住菩提道; 今既大地遍震動, 我證菩提定無疑。 我今既得菩提記, 即轉法輪無有別; 猶如世尊所說法, 我百數劫已得聞。 及諸比丘四眾等; 利益天人八部輩, 又為無量諸菩薩, 汝等於佛莫牛疑。 當來悉成無分別, 是故決發菩提心; 諸法皆悉如幻化, 諸佛所說如夢想。 是處無人無養育, 眾生命及富伽羅; 喻如虚空無有異。 如是諸法本性者, 我先所有女人身, 彼身空體亦無實, 既無實體是為空, 空體無物無可取, 彼身顛倒分別生, 分別猶如鳥飛空。 意欲成就佛菩提, 復欲降伏四魔眾, 復欲三千大千界, 轉於微妙大法輪。 汝等猛發菩提意, 尊重供養婆伽婆, 不久當成功德尊, 同於直體無有別。 善利丈夫尊沙門, 二足中尊我頂禮, 能施愛物常得愛, 能施法財得自在。 佛是樂本能與樂, 能伏怨讐及諸魔, 我嘆應嘆最勝尊, 又嘆自在無羨者。 我意所觀諸方處, 願見諸佛不思議, 放光如今釋師子, 我亦當知十方佛。 皆悉同體覺一法, 於真如法悉無二; 有此忍者當作佛。」 無量眾牛同實際,

爾時月上菩薩說此偈已,從空而下頭面作禮。彼作禮時頭未離地,而有無量百千數佛現其目前。彼等諸佛同音授彼月上之記,當成阿耨多羅三藐三菩提。月上菩薩眼自對見彼百千佛授其記已,歡喜踊躍遍滿其體不能自勝,即從如來求請出家,白言:「善哉!唯願世尊!自說法中與我出家。」

佛即告彼月上菩薩:「若必然者,當問父母聽汝已不?」

爾時童子所生父母,對見如是變化神通,復從佛聞為彼授記,而白佛言:「如是世尊!我等已許。唯願世尊!放彼出家;又願我等於未來世會如此法。」

爾時世尊即放童子而出家也。時彼童子當出家時,即有一萬二千人俱發阿耨多羅三藐三菩提。

佛說如此法本之時,復有七十那由他諸天人等遠塵離垢,於諸法中 獲得淨眼;復有五百諸比丘等,於無為法獲得漏盡心得解脫;復有 二百比丘尼等與其同類二萬人俱,其中或有未曾發於阿耨多羅三藐 三菩提者,亦得發於菩提之心。

佛說此經已,月上菩薩,長老阿難,諸菩薩眾,及彼大會天、人、 阿修羅、乾闥婆等八部之類,歡喜奉行。

佛說月上女經卷下

CBETA 贊助資訊

(http://www.cbeta.org/donation/index.php)

自 2001 年 2 月 1 日起, CBETA 帳務由「財團法人西蓮教育基金會」承辦,並成立「財團法人西蓮教育基金會」- CBETA 專戶, 所有捐款至 CBETA 專戶皆為專款專用,歡迎各界捐款贊助。

您的捐款本協會皆會開立收據,此收據可在年度中申報個人或企業的綜合所得稅減免。 感恩諸位大德的善心善行,以及您為佛典電子 化所做的一切貢獻。

信用卡線上捐款

本線上捐款與聯合信用卡中心合作,資料傳送採用 SSL (Secure Socket Layer) 傳輸加密,讓您能夠安全安心地進行線上捐款動作。

前往捐款

信用卡 (單次 / 定期定額) 捐款

本授權書可提供單次捐款或定期定額捐款之用途。

請於下載並填妥捐款授權書後,請傳真至 02-2383-0649,並請來 電 02-2383-2182 確認。

或掛號寄至 10044 台灣台北市中正區延平南路 77 號 8 樓 R812 財團法人西蓮教育基金會收。

請在此下載 授權書 (MS Word 格式)

劃撥捐款

郵政劃撥帳號:19538811

戶名: 財團法人西蓮教育基金會

欲指定特殊用途者,請特別註明,我們會專款專用。

線上信用卡 / PayPal 捐款

PayPal 是一個跨國線上付款機制的公司, CBETA 引用其服務,提供網友能在線上使用信用卡或 PayPal 帳戶贊助 CBETA。

PayPal is an online system of a global payment solution. CBETA uses its service to provide the uses to donate by using the credit cards or PayPal account to support the CBETA project.

相關收據開立事宜,由於付款幣別為美元,我們除了會依您所贊助之美元金額開立收據外,另我們會依捐款當日公告匯率開立台幣收據,此收據為國內正式合法報稅憑證。

Since the donation made is in US currency, hence all the receipts will be issued in the US dollars consequently. However for the domestic donators, a Chinese official receipt will also be made according to the foreign exchange rate for the purpose of tax deduction.

<u>線上信用卡 / PayPal 贊助</u>

支票捐款

支票抬頭請填寫「財團法人西蓮教育基金會」。

CBETA is part of Seeland Educational projects, any donation (ex-cheques, remittance, etc.,) please entitle to "The Seeland Education Foundation".